

## **Plenchi**

### **Bèl a bati**

**Tring tring trrrringggg ata e ora a yega pa nos kompartí. Yega na bòshi pa nos por repasá e siman tras di lomba. Na skolnan avansá e tutsnan kasi ta tras di lomba, ta her so falta awor. Na fundeshi tambe tutsnan a kuminsa kaba, pues nos ta den etapa final pa loke ta trata aña eskolar 2015-2016. Esei kier men ku plenchi ta serka di tuma un sosiegu tambe. Nos ultimo plenchi lo ta 25 di yuni. Pues nos tin 2 plenchi mas pa e aña eskolar aki. Nos lo kuminsa ku plenchi bèk prome djasabra di september. Duna skolnan chèns pa nan kuminsa trankil, pa despues nos por publiká nos plenchi di skol manera bo gusta.**

**St. Jozef VSBO a organisá un atardi pa tur nan hobennan por hasi nan sakramentunan manera iglesia katóliko ta kustumbrá. Boutismo, risibimentu i konfirmashon. Un pabien na st. Jozef VSBO ku un bunita oportunitat pa nos hóbennan. E parti di spiritualidat ta masha importante pa nos efoká riba dje. Nos tur sa ku e parti kognitivo ta resaltá si nos ta formá ku norma i balor spiritual. Formá pa biba den harmonia i kontibui konhuntamente na un ambiente di biba salu pa nos mes i otronan.**

**Plenchi ta bai sosegá di e weekend aki, i nos lo ta bèk pa sirbi boso otro siman ku Dios ke. Mesun kaminda i ku mesun kariño.**

### **Den agènda**

**Dianan liber di skol**

- **Fakansi grandi 4 yuli te ku 10 ougustus 2016**

**Konferensha pa personal skolnan katóliko 8 di ougustus 2016**

**Promé dia di skol pa alumnonan ta 11 di ougustus 2016.**

### **Mi ta konta**

**Tata ku yu ta disfrutá**

**Ramfis a baha su kasá na kapsalon i e ku su yu Angelo a kue rumbo pa kas. Na kaminda nan a pasa banda di un rancho di kabai. Angelo a suplika su tata pa nan baha un ratu pa e wak e bestianan. Ramfis a pensa ku ta bon idea pa e pasa un tiki tempu ku su yu, hasiendo algu rekreativo. Esta bon ta ora bo hasi algu ku bo no plania, sin stress i sin**

niun kompromiso. Nan a kana wak e bestianan i a kompronde ku nan por a kore kabai tambe. Ramfis no a pèrde pa gana el a disidi ku nan ta bai dal e paseo di un ora riba kabai. Nan a subi i e instruktor a guia nan bai keiru den un mondi serkano. Nan a disfrutá di kada momentu di e trep. Ora nan a yega e rancho bèk nan a kumpra kuminda i kome un sukulento plato huntu. Despues di un bon ratu Angelo a puntra su tata: “kiko nos ta hasi aki nan papa?” E tata a tuma su tempu pa splike ku ta un dia pa tata ku yu i ku nan mester hasi e kos ei mas bes.” Angelo a bolbe ripiti e pregunta, “kiko nos ta hasi akinan aworaki papa?”. E tata a bolbe kuminsá su kuenta di relashon entre tata i yu. Angelo a interumpie bisando: Awor aki ta atardi kaba, nos no mester a buska mama 12 or merdia for di kapsalon?” Awel mesora Ramfis a kue su telefon i a mira ku su bateria a baha. Mesora stress a dal aden, ata su dia di relahá ta bai kaba den un pleitu. El a kuminsá murmurá:”Hende muhe ta problema, nan no ta komprondé ku mester relahá.” Den Ramfis su kabes tabata pasa diferente senario. Pero el a konklui splikando su yu: “ta tempu pèrdi pa purba na splika mama ora nos yega kas ku nos a disfrutá perde noshon di tempu. Paso nos no a lubidé nos a lubidá tempu.” Ramfis i Angelo a wak otro den kara i tur dos a kuminsá hari. E dia aki lo keda pa semper grabá den nan memoria, e lo mara nan semper huntu.

## **Un prenci**

St. Jozef tabata grandi ku su selebrashon den un ambiente bendishoná. Skol a prepará tur hóben ku no a boutisá, risibí òf konfirmá pa nan risibi nan sakramentu. Despues ku nan a bai di akuerdo a prepará nan debidamente pa e dia grandi. Djasabra ultimo e hóbennan aki a risibi nan sakramentu i despues a fiesta ku un resepsion na skol. Masha pabien na e hóbennan, nan mayornan i e personal di skol ku e bunita dia aki. Ta un dia ku hamas nan lo lubidá.







## **Mucha djispou**

**Xavier ta drenta den un pakus pa kumpra kos. E dama den e snèk ta puntra:”Kiko mener ta deseá?”**

**Sander:** “Mare bo ke sa. Mara mi por tin un kasa mes bunita ku bo. Un kas grandi pa nos dos por kompartí i basta sen pa nos dos por keiru rònt mundu.”

**Dama:** “haha, pero awor den serio kiko e ta bira?”

**Sander:** “No, ainda mi no sa si nos ta haña yu muhé of homber. Pero kua ku bin ta bon basta e ta salú.”

**Dama:** “No, mi ke men kiko mener ke kumpra?”

**Sander:** “ahan asina, Pero ki tin?”

**Dama:** “Ay nada partikular, tur dia mesun kos. Lanta bai trabou, para henter dia riba pia. Ya kua ke hasi, pero mi no ta reklamá.”